

四庫全書

集部

欽定四庫全書

集部

石倉歷代詩選卷三百八十七

詳校官編修_臣謝振定

侍讀_臣孫球覆勘

總校官進士_臣朱 鈐

校對官檢討_臣季學錦

謄錄監生_臣朱 堦

欽定四庫全書

石倉歷代詩選卷三百八十七

明 曹學佺 編

明詩次集二十一

丘濬

古意

千金買寶刀 百金買角觿
寶刀頭有環 角觿能解絲
殷勤寄遠人 用以慰所思
所思不見察 幽獨甘自怡

感興

天際多剛風滄溟隔弱水相思不可極之子在萬里萬里各一天恍惚在我前區區倘見察敢不輸中悃

過友人園居

愛此林泉勝載酒時來過芳樹發春華方池激清波嘉魚爭出躍好鳥鳴相和天氣既已暄景物亦已多主人雅好客相對酣且歌歌竟各歎息人生能幾何

月下懷

明月空中懸碧雲天際合美人渺何許望望轉蕭索翩
翩驚鵲定片片簷花落惻然對孤影下帷閉齋閣

擬古

江南秋風至草木變黃淅淅吹入衣使妾增悲涼悲
涼知為誰良人在沙場暮聽邊馬嘶朝看塞雁翔飢殮
風中糜渴飲雪下漿羊角衝地起沙礫爭飛揚回首望
故鄉長天但茫茫豈無肥與甘亦有衣與裳妾心空惻
惻路遠莫寄將北望長太息涕淚如雨霽幾欲往從之

河廣無舟梁仰天籲中忱矢志期不忘但願南風競吹
君來妾旁

雜詩

南國有珍木中含要妙音匠氏一顧之斲削為素琴絙
以朱絲絃寄以太古心時時橫膝上山水託意深別鶴
為翔舞遊魚躍幽沈云何世俗耳不如魚與禽雅鄭竟
莫分吾心安所任

秋懷

草木忽變衰惻然感我心鳥飛日向暮豈不懷故林閱
人日已多涉世日以深高官世所慕直道古所欽青青
海中山遙遙山上岑行行即可到決意須在今有山不
歸去何勞憶山吟

送劉紹和還南京

交游徧寰宇契合無幾人駸駸入老境落落星在晨
鼎百年間會晤能幾旬況復限區域世務縈其身久別
喜相見見疎情轉親俄頃又復去寧不含酸辛緬懷古賢

哲未必生同辰道同心自契千里如比隣溶溶天上月
湛湛空中雲舉目即見之光景常如新

文江王文學輓章

茫茫宇宙內山林多隱淪白首抱幽獨沒世志莫伸所
以高蹈士往往增悲辛寧知造化理得失恒相因在生
雖不遇後嗣多有聞父子本同體何必親其身請看芹
水翁肥遯文江濱幸哉有賢子委質為王臣生被冠紱
榮死鐫銘述文耿耿不亡者浩然長獨存

送吳旦赴南康文學

匡廬古名邦山水多幽勝
香爐生紫煙彭蠡涵明鏡
民淳風俗古地僻鶯塵靜
昔賢過化處草木皆可敬
橫經講道餘無事一游泳

游泳何所適白鹿有遺基
近聞鄉先達起廢重構之
突兀有新宇剝落多古碑
千載紫陽翁垂訓留明規
古稱數學半曰此以為師
勗哉毋自畫賢聖皆人為

題古康三洲巖寄京中同志

羣山勢龍聳一穴空
谿滴乳成物象峭壁繡
鮮花土鼓有函音丹竈
無遺砂誰云蓬萊洲此
名殊不嘉我來恣清賞
疑是古仙家惜哉竒絕
景落此窮海涯模寫不
能盡述語人謂誇鳳池
文彩客刷羽期餐霞

題畫為蕭考功作

愛此春山秀微雲淡淡
悠悠蒼松俯深澗翠篠
媚清流結屋者誰子獨
占雲山幽抱琴循側逕
引領仍歸舟歸舟天際
來何時經丹丘丹丘多
羽人為問相見不

入夏草木長林壑迥幽雅雲際川光浮石罅巖溜瀉誰
當三伏中高會江亭下倚席和棹歌縱目極平野鷗波
浩蕩間羨彼舟遊者臨淵空有言結網人何寡

弘治初元春二月十五日皇上躬耕藉田臣濬
叨在九卿之列預行九推禮感而有作

我本農家子世業在犁鋤生來好詩禮舍農去為儒筆
墨其來耜經籍乃菑畬脫迹田舍中致身承明廬日食
太倉米八珍頌天厨不知稼穡艱豈解耕耨勗云何七

十年乃爾復其初

謾成

夕陽昨陰翳朝陽還繼升萬物被輝耀炎光正熒熒浮雲起咫尺白晝仍冥冥世無駐景戈空懷百尺繩

採蓮曲

蓮花紅蓮葉碧紅似妾容粧碧如妾袞色輕紅易落碧易衰情人道來竟不來停橈轉棹日過午藕絲斷盡蓮心苦

搗衣曲

涼飈透窓紗蕭蕭弄秋色妾在江南尚不堪況君遠在
陰山北風吹妾身寒妾念君衣單起來搗衣明月下寧
辭膂力摧心肝

花遊篇和楊廉夫韻

雲樓霧閣深濛濛弱流萬丈號天風姓名久注丹臺裏
浮槎直泛銀河水凌空八翼飛天門若木不冒鮫綃裊
天衢空濶舒踣步俯瞰人寰惜丘墓一聲鐵笛自天來

擬借重湖為酒杯珍珠落槽冰在椀霧閣歌唇玉奴板
天邊一任烏輪西拂塵掃石題復題鸞儔鳳侶隨蝶使
爛漫芳遊日三四醉揮彩筆漏雲箋試寫遊神八極篇
登高丘而望遠海

登高丘望遠海身居岷壘間目極蒼茫外神遊八表縱
大觀氣噓千丈發長慨直從混沌鑿破初大徧虛空無
盡界天於子會開一元地自海隅分兩戒山萬重水千
派神禹勞勞躬四載野外脩途七聖迷海上神仙六鼇

戴波濤洶洶泛蒼溟沙漠茫茫連紫塞豈不欲鼓柁登
瀛洲却愁弱水難勝芥豈不欲振策赴瑤池恨無神駿
能歷塊不如振衣千仞岡老眼空明無障礙近山列翠
屏遠山抹青黛太華三峯勢若蹲黃河九曲流如帶舜
功封濬四海同禹蹟平成萬世賴三十六洞天處處藏
神怪七十二福地一一異姿態驅山走海入雙瞳咀今
嚼古供一噉山嶽降神生異材景物因人成勝槩安期
竟不來漢武空相待峴山依舊存杜子今安在挂劍殊

非昔日墳釣魚乃是今時瀨赤壁人尋折戟磨浯溪客
打殘碑賣往古來今倏成忽敗物理不齊時光難再扶
世教者何人歷變故兮幾代古蹟日已湮昔人日已邁
瓊樓玉宇不勝寒民墮顛厓苦凋瘵重衾春暖夢無魚
破釜塵生色如菜口談詩禮半盜儒醉擁韜鈴多債帥
借時感事氣填膺以手撫摩聊一噫君不見地為輿天
為蓋人在其間稊米大分明芥子納須彌毛孔真能動
渤澥逐日何須隨夸父步地誰云不章亥請學尼丘古

聖神越過東山登泰岱

濁海歌

天下百川皆清漪一流入海便成緇茫茫不復辨涇渭
混混孰與論澠溜洪濤巨浪轟轟怒不覺已身如穢瓠
看來何似山下泉清香凜冽為人慕我向潮頭三歎息
志欲澄清勢未及願言上帝檄天吳一夜黑波便成碧

題李將軍四時行樂圖

日華淡淡雲陰薄兵衛森森擁鈴閣旌旗不動柳風輕

劍戟無聲花雨落將軍新試越羅衣兩袖春風拂地垂
閱徧三軍超距樂晚涼乘興詠歌歸

松風流響團涼影翠薄翻空火雲冷一軍無事枕干眠
萬馬不嘶清晝永將軍宴坐凝清香靜對珠鈴萬慮忘
不用更揮諸葛羽溶溶心月自生涼

霜染楓林秋氣肅潦水收痕山露骨狼烽一夜化為鷹
百鳥含羞傍林麓將軍小隊出西郊金環玉勒青驄驕
鳴彈一聲軍吏賀半空雲外落雙鵬

凍雲不飛朔風直野獸畏寒出還沒角弓鳴鵲趣燕飛
霜鏑吐芒驚鬼哭將軍自控五花驄翩翩雲騎爭追從
射殺南山白額虎碧油幢底夜論功

雲山清趣圖為歐道人作

山矗矗雲漫漫雲容山色微茫間一天淡月秋空靜滿
地落花春雨寒道人愛此有清趣穿雲結屋依山住一
縷茶煙午夢餘兩腋清風欲飛去欲飛不飛無限情拂
絃時作太古聲驚猿呌月淚潛墮老鶴知更相和鳴夜

深萬境俱岑寂兀然虛室時生白回頭人世隔紅塵雲
山慘淡無顏色

輓羅都御史

正統己巳北兵深入當道者建議趣召宣府總戎
官率兵入衛或欲遂棄其城衆紛然爭就道時羅
公為巡撫乃毅然仗劍坐當門下令曰敢有出者
手斬之衆遂定口外人至今能言之載諸宣府志
公平生事業固多而此舉尤為卓偉抑菴先生作

墓志畧不及何也濬初來京師時嘗拜公于寓所
極蒙獎諭及濬登朝公已致仕家居不久捐館舍
矣辦香致敬其道無由茲因其壻鍾輅應貢來致
其子泰命求輓章因次第完城事為韻語以補公
志之畧云

六飛北狩無消息邊城四望狼煙赤邊馬長驅去復來
何人坐畫捐邊策鎮朔將軍生入關北門鎖鑰空餘鏐
強兵健馬盡南走黃塵蔽日天漫漫白首憲臣南海客

手持一劍當門立誓與孤臣同死生怒髮衝冠氣千尺
車輪生角馬駐蹄居人不動行人歸叱咤之間樓櫓具
金城鐵壁湯為池雲州失守赤城破健兒躡足邊城過
老妻穉子盡登陴公亦援袍雪中坐山前山後無數城
此城屹立如巨屏蔽騎南來資扼塞王師北出恃屯營
屏蔽京師功卓偉謾有長城長萬里江淮果賴張真源
河朔僅餘顏御史憂國勞邊兩鬢霜事成乞骸歸故鄉
肘金腰玉者塞路無入上書訟陳湯一葉扁舟五湖水

漲海路邊亂山裏折簡不通朝貴書抱膝長吟聊爾爾
羅浮山崩天墮星乾坤一夜收英靈公兮生死已無愧
邊人至今嗟未平邊人能言不能紀慚我鄉生官太史
聊述人言作些詞書罷長歌淚如洗

題山水圖

昔年棲迹雲林下舉頭見山不見畫如今置身朝市間
開眼見畫如見山山耶畫耶孰真假具眼之人世間寡
景當好處皆起樓趣到佳時急驅馬居山不見山中佳

厭飫林壑輕煙霞一朝別山出城市黑風黃日昏塵沙
廣庭曲巷通幽處壘石栽花脩勝具眼中彷彿雖逼真
畢竟人為靡天趣回思舊隱隔世間欲一見之千萬難
殘縑斷素纔咫尺傾囊倒篋不復慳君從何處得此幅
千里雲山數間屋遠山淡淡橫翠眉近山亭亭削青玉
山頭處處飛白雲樹頭樹尾晴輪茵丘林忽斷天光露
晴色遙連雨氣昏蒼苔白石羊腸路平麓盤盤幾家住
就中老人華陽巾手把瓊芝滴清露山光水色相渺綿

漁舟泛月江涵天長風浩浩起空末高堂白日生雲煙
興來却憶竹鶴老見畫何如見山好人生即景須盡歡
尋仙何必蓬萊島

題李都督虎

陰風颼颼振林木百獸魂飛草木伏舉首為旗尾作旌
白晝橫行誰敢觸汝虎雖猛何如人慎勿夜逢李將軍
將軍射石尚沒羽薄肉淺毛何足數

畫菜

世間食品何者佳淡中滋味真無加富客何須悅芻豢
神仙謾爾餐煙霞聞君作縣官河側繞屋築畦供日食
食餘手腹遶園行喜得邑民無此色

梅窓琴樂

高人好琴得天趣閑窓靜對梅花樹江空歲晚夜深時
丁丁似共南枝語淡香疎影太古音箇中樂趣清且深
等閑三弄梅花曲花不在梅花在琴

題竹送湖廣湯僉憲

古來脩竹何處多鄠杜之間淇水阿填河落爛竹官廢
但見土岸流渾波北風寂歷南風起千里飛青渡江水
瀟湘兩岸遙相連斑斑盡染虞妃淚鵜鴂鳴時草不芳
杜衡揭車總荒涼獨有此君不改色挺挺植立如人長
頽雲壓頭低復理細雨斜風任梳洗渭川豈但千戶侯
孤竹誰云止二子君今持節騷人鄉眼中所見皆鸞皇
清風明月有真境寫影何必勞玄香平生愛竹應成癖
此日移植近霜栢滿堂秋色寒瀟瀟一笑出門楚天碧

題松

蒼龍拏雲欲上天
鱗甲飛動頭嶄然
碧風吹海翠濤湧
笙簫一派空中懸
深山大壑無人到
琥珀埋光兕絲槁
家家束葦作簷楹
未必長材此中老

題童志昂都憲蠶叢圖送其再使蜀

蠶叢之國妖氛生
羽書雜遝來天庭
九重天子赫然怒
咨誰可使西南征
虎頭將軍攘臂起
怒髮衝冠爭裂眦
長鎗大劒置不問
竭來獨運毛椎子
毛錐子藏鋒鋠貯

雲含霧飛電光鋼刀百鍊非不利銳矛八尺空自長螭
坳當日曾簪白纓血流丹今變赤捫參歷井掃欒槍坐
使岷峨迴秀色却笑漢家功業卑臨邛天子騰虛辭唐
蒙已通輶中道嗷嗷筆舌將奚為何如此日功尤偉赤
子弄兵潢池裏輕裘緩帶笑指揮曳白書功報天子平
地誰知有伏機中山篋書終致疑張嬰就擒滕撫黜古
來往事多如斯外境息來專內養往古來今閒俯仰邊
機事動問陳湯枹鼓聲聞起張敞劒閣峩峩棧道連高

樓百尺仍籌邊君不見積功滿千簡上玄英雄回首即

神仙

得過且過

華山有鳥名寒號蟲方春時鳴曰鳳凰不如我至冬毛羽皆落則又鳴曰

得過且過藥中五靈脂即其糞也

得過且過多福何如少遭禍紇千山頭凍羽乾真信鳳凰不如我得過且過

行不得也哥哥

金兵追宋隆祐后至章貢幾及之時人有詞曰天晚正愁予春

山啼鵲鵲蓋言行不得也

行不得也哥哥十八灘頭亂石多東去入閩南去廣溪
流湍駛嶺嵯峨行不得也哥哥

不如歸去

元至正十六年
子規啼于居庸

不如歸去他鄉不是羈栖處休教久客滯天涯歸兮記
取來時路不如歸去

幽居

郭外幽居好橋邊小徑斜紅飄桐井葉黃落菜園花淺
淺浴鳧水團團宿鷺沙板扉青布旆記取舊東家

晚泊

風定帆初落
籬根泊晚晴
寒潮隨月上
秋水共天清
隔竹見燈影
橫江聞鶴聲
有懷愁不寐
坐數驛樓更

寄題金山寺

岷江萬里下
梵剎半空開
吳樹風吹斷
淮山水蕩迴
潮聲雜鐘磬
波影動樓臺
千載張公子
題詩會再來

人日有懷

七日逢人好
三年作客賒
塞雲晴度雁
城日曉翻鴉
雪

化經冬水梅開隔歲花欲歸歸不得惆悵惜年華

題空上人方丈

地僻少風塵僧居卧隱淪煙霞方外境水月定中身長
日飯留客夕陽鐘送人他年如結社還許醉相親

秋日寄友

雲海歡遊地別來今幾何壯心隨日減歸思入秋多細
雨滋蒼蘚寒風剪敗荷有懷誰與共搔首短長歌

秋晚答友人

朝罷歸當早官閒客自稀
少書隨處借多病與時違
訪舊憐俱老逢人厭說歸
傷心秋已暮未寄北堂衣

過峽山飛來寺

三過飛來寺今朝始一登
恍疑山是客何代我為僧
鐘響出幽壑猿聲啼古藤
本無來與去明日問南能

輓遼東都帥

聞說遼東帥安邊屢有聲
烽煙稀夜警部落競春耕
共道營星碩空餘塞月明
幾多門下士流涕濕長纓

送謫宦者過還揚州

曉日都門道西風酒一卮幾年悲玉後萬里賜環時古
木前朝寺殘花后土祠淮南風景好歸棹莫教遲

送韓敬夫下第因東同志王璫

憐君失意去一笑折垂楊老劍閒霜鏑新詩重錦囊人
歸盤谷遠山遠太行長好學王摩詰來薰漢殿香

寄題南華寺大鑒禪師

佛法東門旦禪宗肇嶺南一溪香氣水萬縷藕絲衫結

子花開五先人棗示三心燈受弘忍梵派演瞿曇山頂
青螺聳波心碧玉涵衆流歸大海孤月印寒潭藹藹花
雲暖瀼瀼法露甘未迴煙水棹空費葛藤談奏樂皇岡
石翻書古相巖也知祖堂近無暇一登參

五指參天

五峯如指翠相連撐起炎州半壁天夜盥銀河摘星斗
朝探碧落弄雲煙雨餘玉笋空中現月出明珠掌上懸
豈是巨靈伸一臂遙從海外數中原

春陰

一春長是晝昏昏
景色三分減二分
別院飛鶯衝宿霧
遙空歸雁叫重雲
踏花庭畔難尋影
隨柳江邊不覺曛
天意似晴還似雨
還將早晚問東君

寄張鍊師

辭家學道入青冥
曉汲清泉午斲苓
衣染春雲同鶴色
劍涵秋水帶龍腥
吟成白雪風生席
歌徹青天月在庭
幾度緘書寄仙侶
蓬萊猶自隔滄溟

歲庚午來自金臺寓新河有金陵即事之作
明年復至因觀高槎軒詩不意暗與之合有如
剽竊然初實不知也用廣其意為雜詠二首
云

雲中雙闕俯秦淮天外三山對鳳臺
二水合流趨海去六峯飛翠過江來
金陵王氣千年盛鍾阜晴雲五色開
愧我才非班馬匹可能無賦奏蓬萊

父老依稀說六朝當時伯氣已全銷
新亭別淚寧須墮

古井妖魂不可招
瓜步客帆晨帶雨
長干僧艇晚隨潮
行人不用誇天塹
南北輿圖總屬堯

和李子構都門春日韻

寶馬雕鞍白玉珂
花雲淡蕩柳風和
梵宮密密開金剎
海子深深湛碧波
郊外踏青遊客醉
水邊修禊麗人多
誰憐寂寞揚雄宅
門巷無人自嘯歌

座中有搗箏者作白翎雀曲因話及元事口占
此詩

銀甲彈箏話廢興
羶車宵遁土城平
興隆無復殘笙譜
劈正誰知舊斧名
起輦谷前馳馬迹
居庸關外子規聲
不堪亡國音猶在
促數繁絃喚白翎

病起寫懷

寸心千里日懸懸
歸計今秋又似前身
似凍翎飛不去
事如春蔓苦相纏
還家路梗須浮海
報國才疎只望年
幾度可憐還自笑
羨魚何事復臨淵

送陳緝熙修撰使高麗

海上天風吹節旄，玉堂仙客錦宮袍。
詔頒龍闕恩初下，詩到雞林價倍高。
萬仞鰲金浮曉日，雙江鴨綠漲秋濤。
遠夷未識中原鳳，爭覩文章五色毛。

都城春日

宮闕巍巍紫氣高，西山東去碧周遭。
天晴魚躍龍池藻，春老鶯含御苑桃。
映日暖雲流似水，浥塵香雨潤如膏。
太平有象尋常醉，不用金龜換濁醪。

秋興二首

風掃長空積雨晴
短槐疎柳亂蟬鳴
沙頭鷗鳥尋常去
江上蘼蕪日夜生
嘉樹有蹊荒蘚合
好山無數斷雲橫
却懷九曲餐霞客
獨抱銀蟾遡紫清

秋風秋雨夜淒其
凭几沉吟有所思
驚鳥故投曾宿處
開花還是已殘枝
喜看淡月穿雲出
靜數遊絲墮地遲
萬里鄉心千古意
興來聊誦少陵詩

舟次直沽簡彭彥實同寅

潞河澄徹衛河渾
二水交流下海門
直北回看龍闕近

極東遙望蜃樓昏孤城近水舟多泊列戍分耕野盡屯
我有好懷無處寫欲沽樽酒對君論

送張城中書使朝鮮國

玉節煌煌照海東羨君旌旆拂晴虹鳳麟瑞世人爭覩
魚鼈成橋道自通天入玄菟低沒鵲江浮鴨綠澹蜚鴻
茲行喜從文章客多少豪吟倡和同

送王給事中使占城

銀漢清秋泛使槎節旄晴拂海東霞扶桑水接南溟濶

析木天遙北斗斜
螭首衝風龍伯助
鳳毛儀世島夷誇
皇明威德今無外
莫諱中朝第一家

蘇武歸朝圖

茂陵煙樹碧蕭疎
白首生還志不渝
面目依稀猶似昔
節旄零落已無餘
歸期不待羗生乳
遠信真成雁寄書
頗有幽懷忘未寫
夢魂時復到穹廬

余于學士莊中構堂名以瞻王取歐陽子語也

四壁繪圖

玉堂春晝寂無譁咫尺天宮是帝家金屋瓊樓天上景
琪林珠樹禁中花間揮麟筆書青史細染龍香草白麻
嶺海幾人曾到此他年回首渺天涯

送陳宗堯侍講署南京院事

南北于今兩玉堂儼如東壁望文昌趨朝暫免通門籍
視事榮看綰院章竹汗消青春晝靜槐龍屯綠午陰涼
軟紅塵土長安道還憶聯鑣傍苑牆

題山水

山色空濛樹色深人家住傍碧溪潯半江月照天連水
五月風來秋滿林遜世獨輸高士隱披圖因見昔賢心
人間何處有茲景我欲因之寄越吟

送李立之赴南京太常

奉常從古號清卿君去南京分外清案牘盡懸周典禮
官僚並列魯諸生含香每月朝鍾阜訪古常時到冶城
却恨無由追驥尾鳳皇臺上聽簫聲

送畫竹屈生

東風吹散漕河水旋買吳船載酒行野樹依依連故國
雲山點點引歸程郢中誰和陽春曲吳下多傳子夜聲
白首奉常無恙在韞才應已付鄉生

送人遊嶺南

君行是我來時路贈別因思舊所遊綠柳春風巢翡翠
碧蕪寒雨叫鈎輶三冬氣暖人揮扇八月天清蜃結樓
風度祠前拜唐相為言早晚便歸休

遊歸信筆付敬之

歸來塵土滿烏紗倦極無言感物華
老景幾時猶戀祿故園何處此看花
病來應世少諧俗閒裏著書空滿車
白首揚雄惟寂莫剩將心事語侯芭

客中對月

萬里思歸客傷心對月華
願憑今夜影回照故園花

山居晚宿

地僻夜沈沈愁雲結暝陰
隔林燈火起照見並棲禽

宣和遺墨

雪暗紆千山凍雀飛不去何似南飛鳥月明猶繞樹

自君之出矣

自君之出矣粧鏡暗塵生妾心似君影隨處逐身行

夜行郊外

四際星垂野微霄與地連恍疑天盡處近隔樹林邊

春閨怨

春雨池塘草發芽春風庭院柳飛花韶光尚有歸時節
何事遊人未到家

書所見

錦衣公子氣翩翩老去心情尚少年
笑折海棠呼酒飲醉來猶自戴花眠

過某氏園亭有感

危牆荊棘鎖重關不許遊人取次攀
一夜西風零落盡牛羊成隊下空山

題墨梅

老龍半夜飛下天蜿蜒斜立瑤階裏
玉鱗萬點一齊開

凝雲不流月如水

石倉歷代詩選卷三百八十七

欽定四庫全書

石倉歷代詩選卷三百八十八

明 曹學佺 編

明詩次集二十二

李裕

登渭川山寺

招提俯崇巘臺閣林木翳攀躋登上頭喜得縱遐睇維
時宿雨收野色開新霽翠律終南高微渺河流細澗猿

號林隈石溜瀉巖際花洞鶴隨行霜蹊馬經蹊清灑滌
心神迫曠超塵世門迤一緇叟振錫被羶罽自說元季
人于今百十歲相與談無生了悟寂中意何如君恩深
方茲民社寄暫憩出禪關歎驚渭泮濟行行幽抱繁悵
然賦新製

望泰山

五嶽宗泰岱誠哉獨崢嶸迢遙亘千里磅礴分徐青戟
列羣峯出翠壓危石層擾擾苦行役望之幽興生安得

躋絕頂舉手擎蒼冥

臨水

湖水濶無際茫茫與天連
繞堤盤綠樹盡日生雲煙
中有一小艇乘流自洄沿
忽聞漁笛聲況見沙鷗眠
閒臨弄晴夕為愛清且連

章丘曉過黌堂嶺

清晨駕征輪馳驅陟崇巘
野樹碧煙深澗花紅露泫
朝暾明瞳矐晴霞爛舒卷
石洞邃幽森層崖屢迴轉
危峯

茂草木險徑蝕苔蘚方踰重嶺高又涉清溪淺入林
愜陰翳停車暫游衍呼童斫樹雞閒步覓松犬窮躋體覺
疲遙睇抱逾展貪訪二賢蹤不知路迂遠堂基盡荒蕪
古樹空偃蹇感懷賦新詩俯石書藤蠟

宿穆陵關

曉從大峴來暮投穆陵宿古道通青徐層關翳林木仰
瞻天宇寬下瞰羣峯矗落日見東溟浮靄暗平陸耿耿
不成寐披衣坐茅屋有事在雲山何能脫羈束山高夜

深寒月色空明煜

過大峴山夜宿古寺

名山奠青齊東南勢橫亘天際聳高峯雲間繞飛磴窮
崖絕險峻急溜疾迸風雨變陰晴煙嵐自朝暝深林
綠陰森閒花紅掩映憩息愜茂松登躋苦危逕禪宮倚
崇岡虛亭敞幽靜落日停征驂闌干時一凭野色望中
遙鐘聲坐來聽日暮哀清猿羈愁亂孤興

宿開明寺與方伯葉拱宸夜話

日落煙霧生林壑忽陰暝疲馬倦宵征憩息斯靈境山
高月光寒庭虛晚色靚閒吟孤興發清論心獨領石乳
滴陰崖巖猿掛枯梗夜深天籟寂雲際星河耿豈不懷
幽栖王程奈拘緊明晨戒僕夫驅車度方嶺

早發膠州往沂與葉方伯馬上一日耳目所聞
見各成古詩

輕颺屏氛翳天際無纖瑕曙河頽坤維殘月明窓紗滿
野亂號雞隔林起棲鴉寂寥對短炬悽惻聞悲笳征驂

命夙駕玉勒黃金駟翩翩渡膠河悠悠徂瑯琊率律山
萬重逶迤路三入驚湍激湍泝深谷虛豁訝陁峴抗亭
館隈隩藏人家細流抱村曲險逕沿崖斜綠危試捫葛
涉深還問槎徒旅憚路遙疲馬倦鞭撻行行雖云苦往
往得景嘉山連遠峯疊溪斷芳叢遮笙簧林間鳥鼓吹
池中蛙空洞嘯虎豹陟澗潛龍蛇岫列若圍屏樹密如
排衙僊宮繞層阿閒敞靜喧嘩煙嵐互明滅竹木相交
加武陵遠相似山陰奚足誇平生愜幽曠愛此停征車

休憇倚茂松披拂塞餘葩道人意勤繆留我飯胡麻山
盤薦細韭澗水烹新茶青童抱綠綺朱顏雙髻了白雪
翻素手清響殊琵琶是時微雨收夕照籠餘霞縹緲川
原迥徘徊瞻望賒不其間火牛灘水空囊沙斯人已淪
謝往事堪傷嗟昨日齊城中百卉方萌芽薰風忽南至
綠柳連青葭匪徒時物變不覺髮已華行邁猶靡靡飄
泊天一涯安如東陵侯學種青門瓜

夜宿臨清公館贈鄭憲副德聚

朔風起庭樹宿鳥驚寒枝高館敞虛寂迢迢夜何其別
來僅踰月如隔三秋期所懷叙未終示我瓊瑤詞銀燭
照綺席酌我黃金卮談笑意方適坐久渾忘疲人生會
合難聚散自有時明晨倣行裝又與君別離

送羅汝聞南還

靈曜迭來往氣序恒代遷自登青雲衢奄忽三十年君
從故鄉來念我世姻聯披軒叙睽闕秉燭坐夜闌笑談
未及已驅車忽言還惜茲相會難中心增鬱煩清露萎

秋草涼颼激郊原魯酒倒玉壺餞送樂水邊君歸劒江
去而我之秦川臨期重躑躅涕淚如流泉南北兩分袂
飛旆何翩翩引領遙相睇泰岳生雲煙情敦諒難忘幽
期結無緣願言慎操履俯仰不愧天

舒城登觀音寺偶會故人朱從善酌酒賡詩至
晚而別

役役苦連旬偶得山水趣龍岡勢盤環淝水奔回互窈
窕青蓮宮獨倚雲間住石門青重重松杉夾微路殿隱

翠微中僧歸夕陽處飛溜濺香雪寶樹凝甘露梵語空
中聞天花簷外雨山開景覺媚溪斷人稀渡超然愜所
適而復故人遇掃石坐林陰携手話平素田家沽濁醪
野老薦香芋賡句喜新聯談空得緣悟醉來恣遊賞躋
高窮一顧遠近閭井分參差峯巒聚鶴巢萬壑松煙歛
千村樹咫尺周瑜城微茫頽羹墓幽懷頗同調徘徊不
能去更約芳春期茲焉重遊寓

宿金山寺雷雨暴作

金山古名寺旦暮煙雲薄突出洪流中羣峯如壁削松
杉蔭逕峴金碧輝樓閣潮滿沙漲平巖傾石參錯久欣
靈境寂休軺甕城郭登眺出世界物色窮冥漠蒼茫海
門濶蕭爽秋景焯船渡歸寺僧庭立巢松鶴樹攀脰已
惛石躡脰猶躡老僧飯彫胡飲我金鑿落旋汲中泠泉
茶鐺松下淪暝還南窓卧凭几縱吟喙江空水月清塵
慮渾忘却中夜蛟龍驚砰訇雷雨作狂風撼窓櫺巨浪
激山脚恍若舟中居盪搖無定著披衣坐中庭神魂頗

驚愕燈下兩僧童怡然相笑詎知天道微變態難測
度須臾風浪恬澄澄迥寥廓

過巢縣黃山峽懷友人孔道甫

峽口夏景清平明下原隰川迴路迂遠征騎苦維繫山
勢幾斷連嵐光時吐吸憩石臨清泉迸流濺衣濕穿林
鳥聲亂摘葭花香襲麥秀喜兩歧黎元頗安輯故人山
中居肯顧侯門揖囊無一文錢惟有書盈笈于今雖坎
軻鳥中孤鳳立文采自殊凡終向梧桐集

巢縣山行遇雨

曉度金庭山夕過白龍峽兩峯爭巘亂石相傾壓向
背林木森險斜蹊逕狹數聲猿嘯哀自在鶯啼恰陰巖
古松樹偃蹇露鮮甲三五田舍翁隔溪荷鋤鋤雲氣竟
濛濛雨聲常霎霎泥途詎可登急澗良難涉僕夫已勞
瘁疲馬力尤乏豈不憚馳驅皇恩未覃洽

宿山寺懷友人

碧山晚煙薄柳色連荒城夜深衆籟寂霜天月華清翩

翩雨花滿沉沉慧燈明暫憩禪子室滌我心上塵接琴
不成音懷君栖林垞何當解簪組洛社同締盟

成化辛卯八月望日遣祀文信國因賦

宋祚日益微北元恣憑陵公歸在田野奮出罔顧身無
乃扶綱常忍視大厦傾累陳備禦策宰執以迂稱臯亭
時見留間闕度儀真幸而脫虎口飢食餘糝羹乘驢潛
入溫王室圖復興君親痛在念崎嶇奔滄溟諸鎮徧移
檄到處皆元兵豈無勤王者勢孤力弗勝倉卒飯五坡

被執徑北平絕粒乃復甦哀歌歎零丁召見固不屈豈
憚丞相交不寢傷國亡數載拘幽囚人生異禽獸所貴
義與仁公負剛烈姿持執猶堅真慷慨論大義從容以
就刑精忠貫星日勁氣凌蒼冥所學聖賢事誠不愧所
生煌煌照汗竹名垂萬古馨

題涼棚

歲在敦牂日臨東井斯時也祝融司命炎威始施
顧予患軀奚能當此蒸鬱思欲避之乃于後苑之

中背牆面屋壘土為臺柱以四木上架檉櫺傍編
葦竹北則開牖以引清風南則虛敞以通出入名
曰涼棚為避暑設也棚之周圍雜時瓜匏間栽豆
莢條蔓延施茂密交結艷萼霞鋪濃葉鱗疊誠若
錦屏其下柔荑新茁嫩蘚方滋苒苒萋萋迷階匝
地又若綠茵此棚中之勝也棚之外前有紅蓮後
有紫筌嘉果就實新蔬正肥亦可以娛心目而資
清味當暑盛時予乃獨坐其中綠陰滿室幽香襲

人好風徐徐新涼習習鮮葩競麗時禽弄音嘲
無聞囂喧不到自覺懷曠神怡氣爽情逸心鏡虛
淨百體舒暢雖火雲凝空烈日當戶暑氣一點不
侵予席不毒予腸恍若身在閬苑中不知人間有
長夏也此乃迂陋之人計窮伎拙之所為而乃獨
得其樂之妙若夫大人君子當斯之際自有林亭
水閣琢楊氏之冰山縱河朔之豪飲以相消遣而
聞予之涼棚未有不恥笑而鄙陋之者雖然若或

即而究余之故又有說焉因作詩以寫意耳

初昏火南貞祝融氣方赫當空駕金輪萬方苦煩熱曰
余疲薊軀避炎計深拙一室倚堂虛僻陋囂氛絕叢條
象雲構密葉成藻稅挿槿當籬牖編篁作門闌汲泉決
渠分種藥為區別徑草翳不芟園花紛可擷燕嬉幽抱
舒閒睇生慮歇既乏河朔飲又無仲都訣白團引新涼
石乳清心骨悠悠念往時光景何飄忽廣德欲懸車子
牟猶戀闕暫同戰勝者茲馬坐深樾

君馬黃

三月七日與葉方伯全發濟南作

君馬黃我馬白聯轡出齊門俱是天衢客
暄風拂玉鞭
旭日明金勒一日千里行周爰濟
藉厄男兒建勲猷
姓名垂竹帛回鑣指五雲
蹠躑長安陌

關山月

朝渡二陽水夜上九仙山
四月流清影遠照穆陵關
月明幾圓缺遊子何時還
悠悠千里思臨風起長歎

高唐早行

征車曉出高唐城行行數里天未明晨星燦爛漸東上
銀河淡蕩將西傾山寺疎鐘雲外度馬蹄踏徧溪橋路
輕裘冷烈怯霜風曠野冥濛滄煙霧東方嚮曙海氣寒
滄波擁出黃金盤陽鳥空中曜靈彩六合瞥素餘霞丹
窮壑陰霾盡消沒萬象森森畢呈出淑氣冲融滿太虛
一覽頓令豁胸臆驅馳漸遠村落稀棲鳥飛鳴繞樹枝
兒童處處候樵牧煙火家家勤早炊車從倫鎮暫停轂
三五村翁獻醪醕咨詢風俗近何如咸道身閒衣食足

安得天下蒼生皆若斯端為吾皇頌清穆

題濟寧公館壁間山水東董憲副國器

良工繪畫應擅名故向粉壁施丹青
青巒碧嶂粲如綺溪橋流水空泠泠
煙樹蒼茫隱臺閣白晝寒風起巖壑
兩峯嵯峨插九霄飛瀑一簾半空落
古松偃蹇石崔嵬小舟蕩漾江水隈
春雲如波掃不去野花含笑年年開
我本當時雲路客到處山川多閱歷
遠觀恍若太華之三峯氣勢崢嶸薄
星日近觀又似東岱之天門懸崖雙

扇凌絕壁平生逸興獨超然靜坐對之紛慮釋美人高
趣倘在茲乞歸同買謝公屐

梅隱為丁仕器題

劍城之西劍江隈人家矗矗多樓臺中有高人好奇古
屋前屋後多栽梅冰姿瀟灑心如鐵花林風動飄香雪
臨軒獨對襟抱冲節操應知共貞潔有時樹底笑彈棋
有時花前調素絲吟餘東閣酒醒處夢結羅浮月上時
荷荒豈同陶徑菊清癯絕勝梁園竹逋仙去後久寂寥

喜有高人繼芳躅

楊花白

章丘道中作

楊花三月春顛狂
逐風舞綿輕絮薄
太無情漠漠紛紛
渡江渚佳人見此
獨含悲把臂蹋歌
雙淚垂天長水濶
思未已楊花一去
無時歸

行路難

長山公館開鄭憲副以年老被黜因自傷感作

行路難路悠長
壯年委身事君王
明鏡綠髮能幾時
不覺兩鬢垂秋霜
君不見陸士衡
空歎華亭白鶴鳴
又不

見張季鷹秋風忽動江東情人生富貴有天命知機自
古稱為明行路難難為言滄江一棹且歸去柴門深巷
橫雲煙

將進酒

白日向西逝黃河竟東流河流不復返日逝那能留人
生得幾時一日懷百憂昨日垂綠髮今朝雪盈頭且須
列鼎羅珍羞瓊漿玉液浮金甌山花歲隳紅紫稠此時
不飲將焉求但看古來歌舞地寒煙野草成荒丘

采蓮曲

若耶溪邊日欲西，處處女郎采蓮歸。
濃妝艷艷照溪水，香風襲襲飄羅衣。
蘭橈輕搖下方汜，一雙鴛鴦忽驚起。
見此躊躇空自憐，征夫塞外何時旋。

車遙遙

車遙遙，馬蕭蕭，東方曙，晨雞號。
送君西度灞陵橋，男兒英雄志四海。
建功欲立侍中貂，消息無由聞恩情。
日間阻年去，自年來憂心祇自苦。
惟願車輪行坦途，莫登

九折羊腸之險路

大堤曲

大堤堤上多楊柳大堤人家都市酒紛紛女兒穠艷妝
唱撥琵琶露纖手舟子收帆夜泊堤少年估客心戀迷
折花酣酒醉不醒黃金擲盡不能歸

巡按關西月夜舟泊衛輝有懷

秋風激上苑持節向秦京山月臨函谷官舟泊衛城親
聞頻入夢子舍總關情聖澤云須報寧辭萬里行

夜宿潼關

西巡度關上落日駐旌旄城俯河流險山連華岳高石
門嚴出入壕樹繞周遭孤枕不能寐窮猿徹夜號

岐陽早行懷鄉友鄒王瓚

風靜漏聲徹天清曉色分草凋原上露月沒嶺頭雲飄
薄誰憐我栖遲更憶君江南與江北無字寄殷勤

晚過安邊營

落日黃雲慘荒營草木枯三邊烽火接萬里客心孤戰

騎沙塵染征袍雨雪濡曾聞范招討于此破強胡

過六盤山

曉度六盤嶺崎嶇三十程巖泉近耳響林鳥傍人鳴使
旆鑽雲過肩輿衝雨行誰知絕頂上天色自晴明

秋日關中寄鳳陽衛總戎

歲晚清泉別今秋各一方霜威出塞曲雁影度衡陽路
入秦關險山連淮浦長離情逐灞水何日到濠梁

寓榆林送彰武伯楊總戎出塞

桓桓竇車騎兵畧孔明才喜觀軍聲振應知虜氣摧曉
經月支水宵上白登臺會掃邊氛盡燕然勒石回

渭河早行

官途乘曉霽香露濕行旌涼月疎林影晨雞遠店聲雁
來秦塞曲馬度渭川平聞道邊烽熄封章達漢京

寓秦送處士還南昌

終歲客西秦家山入夢頻如何萬里道又送故鄉人細
雨楚山曉輕雲隴樹春東湖宜結屋孺子可為隣

褒城道中

褒斜通蜀漢百折擁岡巒崖際戍樓出山腰棧道盤霜
林萬葉盡茅屋幾家殘少憩雞頭石猿啼落日寒

龍山驛偶作

驛路通山谷人家傍驛亭芋田和雨種竹牖帶煙局沙
淺溪流碧春深野燒青一樽聊自酌高咏欲誰聽

長山道中

三月齊川道暄風馬首生纔臨溜水渡又見益州城龍

渚煙雲黑牛山草樹平乾坤春意滿隨處有啼鶯

臨淄道中

山擁蒼崖峻溪迴綠逕斜城邊晏子廟洞口魯連家野
芋初齊葉池荷已著花舉頭蓬島近隱隱護煙霞

山中古廟

日午山行處重巒隱古祠虛廊饒鼠跡破牖鎖蛛絲花
落人何在雲歸鳥不知停驂坐來久拂蘚認殘碑

夜宿故人李暹隱士家

路入尊賢里因留處士家
春釭開玉液石鼎沸雲芽
老去情逾好詩成興轉賒
挑燈坐忘倦不覺月西斜

寧海道中次葉方伯韻

雨過平川後聯鑣落照前
樵歌閒野笛炊火雜林煙
遠嶂溪流斷孤城海樹連
鄉關幾千里回首寸心懸

肥城山行

行盡平原路今朝始入山
馬前花氣重林外鳥聲閒
草逕緣岡曲溪田趣水灣
孤鐘夕陽寺杳杳翠微間

寓徐州送友人還江南

古沛通南甸州城接呂梁吳山煙樹暗淮海水雲長草
色侵衣綬花香入酒觴揚舲日暮發臨別思茫茫

舟中遇同年吳圯憲副往洮泯兵備問余彼中
風俗賦此答之

洮泯苦寒地自昔號西戎板屋家家是氊裘處處同花
開春暮後猿嘯雨餘中居處須當避南山瘴癘風

夏日飲平江陳總戎園亭

夏日邀歡賞池亭勝習家青搖金谷樹香度沁園花怪
石憑軒小芳叢夾路斜觥籌興不極愛此絕氛譁

渡揚子江

曉經揚子渡畫舸一帆輕潮滿金山口雲連鐵甕城江
豚吹浪白海日照林明果是中冷水滔滔分外清

夜經高郵湖

入夜喜新霽牽舟湖上行林涵素月白波蘸碧虛清栖
鳥飛還落漁燈滅復明風前聞戍鼓渺渺見盂城

南都題族姪小庄

開軒向南圃僻近大江頭碧玉敲湘竹綃囊破海榴林
喧聞鳥度荇動見魚遊更是歡遊處蓮池蕩小舟

江上晚行

昨日淮西渡今宵江上行波明山月出岸濶海潮生渺
渺孤帆影寥寥一雁聲羈懷耿不寐況復寺鐘鳴

過許東魯先生舊宅

寧陽郭內啼鶯處共醉西樓憶往年故宅重臨人已逝

遺風尚在世空傳
離披藥圃迷荒草
寂莫吟壇鎖夕煙
斜日東山重回首
汶河橋畔水潺湲

莒州道中

盡日馳驅不憚勞
瑯琊陵谷半蓬蒿
囊沙洲畔雲初起
咒虎臺前鳥自號
莒水東歸滄海濶
蒙山斜倚穆陵高
不堪滿目多遺事
馬上吟餘首重搔

登峴山絕頂

峩嵒大峴跨青萬
疊奇峰翠黛凝
山杏煙深纔放藥

碧溪春暖尚流水晴雲漸覺山腰起旭日遙從海底升
今日登臨興非淺捫蘿直上最高層

登九龍山

龍山高出魯城南暇日登臨一駐驂萬壑聲寒飛遠瀑
九峯雲盡藹晴嵐崇岡環抱先賢廟小徑斜通古佛菴
喜有鄉人孟博士相隨坐石縱清談

詠白蓮

石缸菡萏近春栽朵朵含風向曉開青鏡影中搖素彩

綠雲堆裏獻瓊杯
靈根豈自瑤池得
仙萼應從玉井來
最是清奇堪賞處
輕盈終不染纖埃

宛城西郊晚眺

鱗飈涼雨淨山阿
天迥川原萬象羅
翠擁龜蒙連岱嶽
碧搖沆濟入淮河
不堪客裏三秋暮
況復雲邊一雁過
極目西郊歸路晚
馬蹄行徧夕陽多

滋陽道中

征車向曉出城東
驛路迢迢去不窮
茅屋近通顏子巷

雲山遙護魯王宮半溪衰柳清霜後幾處鳴蟬落照中
鄉思不堪腸欲斷汶河橋上數歸鴻

登州遊香巖寺

梵王樓閣碧層層杖屨緣巖試一登牛島雲開青嶂出
龍池風靜綠波澄數株不老禪關栢一盞長明佛窟燈
始覺浮生空繫累如何物外有閒僧

詠雪和袁司訓韻

片片縈風下九州寒光應得映書樓碧窓夜煮茶翻鼎

金帳春生酒滿甌
醉後謾成梁苑賦
興來須棹剡溪舟
百年猶說袁安事
高卧柴門興自優

用韻寫懷

征車兩月道途間
王事驅馳未得還
楊柳却隨春到綠
鬢毛先向老來斑
菊松久憶荒三逕
章疏應無上九關
堪笑鄮侯曾繫獄
祇緣名就不歸山

送虞都憲乃兄還浙

風雨江頭今日晴
琴書遙指向南行
青山歷歷引歸思

疎柳依依闌客情
烏府停驂一雁遠
鵲原回首片雲平
到家且喜梅花發
照水兩枝春正橫

送兵部尹亞卿正言赴京

聖主虛心想舊臣
徵書遙下墨花新
潮隨彩鷁離南甸
星逐征軺近北辰
靜聽閭閻歌屏翰
坐看邊徼息風塵
要將勲業追房杜
肯羨凌煙閣上人

時會畢都憲于鎮江設燕驛樓

鐵甕城高碧樹秋
故人相逐指瓜洲
幾年間濶為君寫

斗酒殷勤招我留煙磬數聲京口寺風帆一片海門舟
驛亭醉倚朱欄曲憶着前朝草木愁

舟次采石過山寺及登蛾眉亭

驛樓當午停官棹寺隱深林試一過僧梵杳聞來上界
淮雲遙望度新河蛾眉亭下生青草牛渚磯頭漾綠波
一自騎鯨上天去釣船空載月明多

題感山寺次涂太守恒孚車進士之韻

寶剎環垣萬竹脩春風足馬昔曾遊花前酒醒杯仍酌

石上碁殘局不收僧梵有時來客座佛燈常夜落漁舟
最憐甘露亭孤迥百尺寒簷迫斗牛

遊感山寺

水繞山圍紫翠堆梵宮高倚白雲隈平階新筍參差出
空澗幽花次第開萬壑松聲風遞過滿溪雲氣雨將來
惟存甘露荒亭在寂莫年年長綠苔

司中夜坐聞砧

明月照重城庭虛夜氣清誰家砧杵響忽動故鄉情

良店即事

寺隱喬林杪舟橫古渡頭柳間雙屐屬玉飛下荻蘆洲

渡口驛道中

煙暝夕陽盡投林倦鳥栖誰家人搥練驚起過河西

開河夜行

日落煙水暝秋聲浦樹多船頭聞犬吠知己近開河

李白酒樓

曾騎五花馬山水恣遨遊一去無消息空存舊酒樓

趙村野望

齊魯兩山斷徐淮一水通
霽天秋色遠楚塞度征鴻

師家庄聞笛

兩岸蛩聲切前林笛韻清
鄉心與秋思耿耿夢難成

夜宿新安

秋高夜氣清露下涼風發
三老應未眠吹簫弄明月

直河遇李大叅自陝來

昔別瀝水潯今逢直河口
間關十餘年相看俱白首

懷肅四兄暨諸兄弟

青青原上草鵲飛復鳴何日南湖上連牀聽雨聲

晚渡淮

日晚渡黃河風清浪花小舟勢疾于飛移時入淮口

蕪城懷古

一入蕪城裏鑿與竟不歸尚餘螢火在夜夜傍城飛

秋日渡涇渭河

茫茫蘆雁起汀洲落木蕭森一片秋客思滿懷無處着

渭涇朝暮為誰流

春寒

細雨踈風暖尚遙
琴書客邸更蕭條
怪來楊柳眉猶蹙
殘雪牆陰未盡消

春夜

夜深庭院寂無譁
寶鴨香消燭影斜
倚徧欄干眠未得
幾枝寒月浸梨花

過萊陽

田橫島外水雲長
萊子城邊百草芳
好鳥兩山啼不歇
清風一騎到萊陽

曉渡孤山

峽口猿啼月影殘
滿林風露怯衣單
平明行盡山頭路
無數奇峯馬上看

峯巒翠律水潺湲
綠樹重重路幾灣
想有山僧住山頂
時聞鐘磬白雲間

莒州途中即事

荷芰含風半吐花平原萬頃暗桑麻數聲布穀啼春雨
燈火前村有幾家

聞砧并蟋蟀

清夜蕭條玉漏沉誰家月下搗寒砧數聲到枕心應碎
況復堦前蟋蟀吟

經九曲池

煬帝行宮俯蜀岡木蘭亭榭已荒涼可憐九曲池中水
猶帶哀音過柳塘

憶揚州夜市

樓臺燈火萬家明
沉復通宵歌管聲
二十四橋今寂寞
月光空自鎖重城

江行

茫茫菰草綠于藍
渺渺長江白如練
蘭舟晚汴急流中
戲浴輕鷗沒還見

題天門山

巨靈穿破碧崔嵬
中瀉洪流去不回
獨有天光與山色

時時隨雨下江來

宿雍城驛

江上風恬水不波
江亭潮滿月明多
夜深暫向驛樓宿
隔岸有人歌踏莎

舟行三义河

雞籠山名

雞籠回首白雲間
西入三义路幾灣
天際兩峯青似染
舟人遙指是含山

道中聞鶯

綠草蒙茸徧四郊
桃花飛盡柳陰交
行人正起傷春思
厭聽黃鸝轉樹梢

宿派河驛

蜀嶺西來抱驛樓
派河東去接淝流
地偏俗陋無車馬
官舍常扃綠樹稠

明教松陰

荒臺日暮亂飛鴉
教弩人亡事已賒
獨有蒼松四時色
層陰長護梵王家

蜀山雪霽

凍雀無聲萬巖鳴
六花飛屑徧山城
日高風靜寒光斂
留得瓊峰映曉晴

淮浦春融

百花如繡草如煙
正是陽和三月天
到處物華堪翫賞
長淮猶覺更芳妍

題舒城龍梅山

層巒疊巘倚天開
梅尉曾茲小隱來
一自乘雲入仙去

煙霞空鎖讀書臺

題舒城龍眠山

龍眠崇巘凌青漢
馬跑飛流瀉碧巖
一自李公歸去後
祇遺書舍護松杉

舒城懷古古舒子
國漢顏羹侯作堰
儲水灌田至今賴之

荒城十里枕龍眠
漢業于今已棄捐
惟有顏羹三堰在
舒民猶賴灌桑田

題六安成寺

煙蘿十里映松林
幾處香泉漱玉琴
試問老僧空寂處
閒雲一片碧潭深

折楊柳

東風道上楊柳枝
幾多攀折送別離
長枝折盡短枝長
明年仍舊含煙垂

烏棲曲

霜華月皎更將盡
閨中少婦芳心靜
烏啼一聲到耳邊

愁腸攪亂不成眠

張元禎

字東白
南昌人

漫興三首

堂堂一區宅豈不堅且好奈茲羣鼠何周垣成穴道垣
墉居所依穴之安可保默默坐終朝憂心愁如擣
倚劒登高臺縱目瞻四極郊野何茫茫萬物莽蕭瑟草
木謝榮華山川失顏色會以回陽春風光仍似昔

吾聞唐虞時明目達四聰如何後來世自作瞶與矇致

令天下情默默不得通撫卷三歎息颯颯來天風

簡楊廷評

鵠鳴海天曙蓬壺彩雲著瓊臺條啓局脩脩集仙侶青
鳥東方來翩翩好毛羽遺我麻姑書招搖脫凡屣

間中有感三首

日出羣動興方寸交榛棘慕盈傾身構拔慳一毫惜癡
蠢強幹運點慧恣探匿哀彼仁義途荒穢視無益

驅車經古城感歎淚沾衣宮闕有遺址草生綠參差當

時千年計築室務築基豈知成敗條徒為來者悲
吾聞大朴散智者常輕世所以許由瓢終掛箕山樹後
來得喪多漫與雞蟲似願見孤鳳皇文彩耀晚歲

贈蕭光甫二首

蘭蕙生崇阿含芳待春風春風豈不妍徒為桃李容老
松卧深山匠石未著目亦有幽賞人時縱松下躅
日暮行次且清影羞自顧彭彭指南車千里猶跬步雞
蟲自得失鳬鶴何短長大材終不棄勉之金玉相

師尚父并四皓圖

龍戰天地疲紫芝顏色好六合函一腔素髮照晴昊逃
聲傳巖靡直釣璜溪老氣感岐下都音生爨中槁赤手
鼇極扶剛風妖翳掃乃知英雄人出處非草草

懼鶴歌

元龍之孫金馬客聳壑昂霄好標格挺如鶴出雞羣中
萬里長空見霜翮何年飛上瑤華池紫鷁黃鵠相追隨
朝遊青田暮玄圃渴飲醴泉飧玉脂清臞不是人間物

無乃前身有仙骨浮丘相法得真傳少保新圖曾寫出
脩然玉立如人長縞衣丹頂玄纁裳一從華表出城郭
不羨軒墀承寵光玉堂深處秋蕭爽警露聲聞九天上
簫韶九奏鳳皇儀闔與神仙共來往

書二詩贈半墨生

千張萬張心印痕寂中城市囂中村鷗鵬摩霄唾燕雀
泰華拔地多兒孫一戈要回三舍日寸膠莫澄千丈渾
試看潛鱗變霹靂龍門咫尺登天門

別城千日如一日別山半年如百年金門玉堂果無分
丹崖翠壁真有綠商歌晝吟聲撼樹老劒夜拔光射天
二雄相過吐肝膽豪氣激發彌無邊

竹雪山房歌

聞君種竹深成林深深數畝長陰陰書堂百尺隱寒翠
閉戶讀書不知歲書聲出竹何瑯瑯風露飄瀟秋夜涼
詩成會應鬼神泣落筆便覺蛟龍翔君家累世擁旄纛
君乃讀書知不足青雲萬里已致身白駒胡為在空谷

他時衣紫佩黃金莫負歲寒冰雪心

山水歌

鬼斧夜劈匡廬裂放出銀潢掛嵒竊深潭百尺吼雷霆
白日半空飛雨雪芒鞋兩兩來山翁隔溪注視心目雄
胷襟稜稜生逸氣鬢毛颯颯來天風我亦平生愛山水
忽見此圖愛入髓他年濯足鄱湖濱觀泉畫我成三侶

蒲桃圖為張雲山題

上林衆卉飄霜籜獨與秋光壯蕭索翠虬三千蟠綠雲

水晶八萬粧羅幕粉署仙郎心愛之半幅生綃圖石落
長風幾度閭闔來柔條欲舞珠欲躍何當摘取釀春釭
香冽應覺醍醐薄瑤觴持去壽君王遮莫涼州可相博

山水歌

我曾扶醉登吳城縱目長嘯清風生廬山萬疊杳如髮
平湖浩蕩涵蒼冥覽之頓爾寬懷抱覺得乾坤隘如竈
便將結草此栖遲渴水玩山遂吾好別來數載居京師
黃埃滿目衣裳緇回思昔遊不可得時時清夢來往之

苦炎正爾樓前坐忽君持此來相過披圖恍惚驚心魂
好是良工為予作江流無窮山見影絕似當時玩時景
是耶非耶子細觀精神颯爽炎威屏嗟余山水癖難移
奈茲簪組為吾羈他時公家事一了便當爛熳尋前時
匡廬山下鄱湖口買斷溪山數千畝芒鞋竹杖任逍遙
富貴功名付無有

二松圖

兩髯如龍入雲去白日空庭作風雨根著九地拔不起

留與乾坤作雙柱千丈免絲千歲苓南山翠色同崢嶸
岳陽城南老髯精駿鸞追逐呂先生

贈睢陽劉君廷用

火星西流雁南翔金莖露滴薜菊芳遼陽人歸白雲屋
華筵酒斟清溪光天南天北遠遊道百倡百和新詩香
君放天真自爛熳我愧進退如藩羊

節婦歌

層冰積雪當嚴冬松柏晚翠欺春紅節婦心腸是冰雪

只有冬凜無春融北堂百年咫尺地立我民彝令萬世
於乎人間亦說烈丈夫丈夫有如節婦無

挽少司空南平羅宏毅

男兒了却書五車一枝高插瓊林花蹒蹒玉陛面九五
笑捧黃紙清磧沙中原蒼生皆起舞邊塞膽落寒雲遮
司空虛席正有待龍蛇歛夢成悲嗟倚天長劍落誰手
斗間紫氣光芒斜

挽獨樂萬處士

山居清隱客適趣任逍遙躡屐穿雲逕扶藜渡澗橋賞
花斟美酒採藥斲靈苗誤入蓬萊島仙魂竟莫招

參高亭

稱得斯亭萬古名光榮誰是貴公卿連甕蝸角無寬窄
九鼎鴻毛有重輕山月上來風自好穴龍潛處水偏清
登臨多少難言趣獨是吾人會此情

冰天桂海滿才名皓髮童顏稱上卿江右到來三尺重
扁舟歸去一帆輕雪消南浦傷心碧梅吐西湖撲鼻清

欲卸朝衫恐難必壽朋胥試有深情

詠月復元善

人心都望此時圓偏是清輝隔暮煙安得剛風駕黃鵠
撥開浮靄見青天冰輪瑩徹金樽裏寶鏡高懸玉殿前
老子陶陶便沉醉任渠明日又明年

和羅一峯贈饒雯峯韻

世事顏生拾甌塵世情龜六巧藏身紛紛斥鷃千層表
拍拍羲皇萬古春稷下也知還有士秦中誰適便無人

盲風怪雨青燈夜幾為蒼生淚滿巾

贈同年林少參縉紳

世事如雲變幻頻一樽誰料此相親
別來歲月俱成夢老去心知能幾人
前日西山仍有雨而今寒谷盡生春
行行不盡相思意五嶺梅花歲又新

贈張憲副之贛州邊備

盈盈秋水呂虔刀岳岳神羊刺史袍
三省不慚邊寄重一時真是眼中豪
風生甲冑龍蛇肅雲卷旌旗虎豹高

萬里長城還有待一方螻蟻暫相勞

贈王司馬竝謝病歸

一生忠義雪霜寒肯為權豪少借顏位重鈞衡心轉澹
慮深軍國鬢成斑黃華翠竹俄生夢綠薤青蒲暫賜閒
安石獨懸天下望未應高枕傲東山

挽劉處士

亭亭風度出塵寰翠竹高梧集鳳鸞詩思剽傳唐製作
家聲不墮漢衣冠南柯夢斷秋風慘北海樽空夜月寒

正是鄉人哀不盡獸袍烏帽畫中看

藜杖煙銷夜閣虛青山還遶白茅居一經已遂生前訓
五鳳空頒沒後書高枕暝雲松樹合短籬疎雨豆花初
臨風無限知君意道遠何由致束芻

挽節婦

彩鸞青鏡早分飛綠鬢蕭蕭換素絲之死不移冰蘖操
矢心寧愧柏舟詩長檠短杼辛勤日冷月悲風寂莫時
此節真堪儀薄俗可憐馮道是男兒

棋

天策沉沉集俊髦
丁丁棋子動金鰲
不知玄武門前事
何似商山一著高

阻風小孤山二首

北風三日吼晴雷
推得頽波萬里回
應是小孤留老眼
雪花堆裏看崔嵬

孤蓬三夜倚娉婷
浪自掀天夢自清
舟子莫嗟前路遠
小姑于我故多情

次淮藩韻二首

萋萋芳草白鷗洲
欲乞先生數筆留
着箇藤蓑慙老子
釣竿終日在船頭

歸帆邂逅落芳洲
安得南風為惡留
畫裏愛詩詩愛畫
玉壺更僕剥泥頭

吳宣

崇仁人

澹菴清隱為紀員外父作

遠憶託飛鳥
妙韻諧素絲
堯舜不必求
巢許無浮思
禾

麻勞樽酒水月投聲詩蟲蟄與魚遊千歲以為期

荆樹分陰

荆花竟誰授解復人心初如何七尺軀翻令百行疏氣
聚天始完流深海不墟于茲竟莫悟泣下收吾書

泰山江河之音

掉頭宇內尋知已知已茫茫天壓水龍馬已被羲皇騎
祥麟恨枕尼山死遂窮碧落羅星斗奎婁散渡銀河走
回經弱水邁扶桑人間曠望空煙數歸來獨把數條絲

試問江山知不知大聲欲裂天腹入低吁夜半鬼懷疑
椎心却與浮生誓未必羣哇盡妖厲春容大吐肺與腸
著他言下誰當契中孚尚感豚魚族黃鍾亦召葭飛速
陰陽正氣醞吾徒天高地下寧皆木遂蠲吉旦祛塵土
上拍乾門下坤戶山靈海若一齊來秣馬遊魚咸欲數
悠哉試鼓宮聲長雲闌斷雁翻天忙騰神再運商聲促
目亂方瞳綠鬢黃移時悶絕不欲舉想是寰間只應爾
曾如萬操卷之囊官爾神化寧而旨無稽別奏一聲幽

緩軫輕吟數弄秋
泛掀溟海煙濤破
打動芙蓉華嶽
豈知此意傳來豁
拍掌傍歌天若撮
指山指水謝前聞
謂言子我神明末
嗚呼此事豈荒唐
牙魂鍾魄諒無亡
淒然苦惹英雄恨
明日滄江風露涼

題嚴鴻臚公山水

神明境界晴霄路
畫閣雲樓誰得住
前峯青配後峯連
萬派清河當面注
云是箕山瓢不在
云是商顏芝不遇
依稀种放舊林居
約莫平泉新草樹
憶昨浮湖到江望

匡山五老追相向飛流濺瀑若馳情紅崖翠壁交吞盪
塵蹤會到山南面駭鹿啼猿連路見西逢數子采薇歌
東遇飛翁身尚箭傷懷欲賦長河弔水不聞聲龍起跳
吼山風撼鳥分栖鬢霧鬚雲魂為掉當時此地良春晝
桃花萬樹波紋縐回颼忽似九秋初筍蕨薯蓣肥不瘦
翻覺我遊成汗漫水角天涯無乃半篙程撞見董生歸
衡張約著鄒忻伴遊還自歎身如夢口不能言心自諷
不知前畫是生然不識今行良故弄情為之迎身為送

神為之疑心為恫嗚呼天地原浮寄睡者或醒醒或睡
何須執着短并長且空數甕論真偽

六月十四夜

向夜月轉白空庭散晚曛穉兒眠趣露馴犬吠疑雲池
小珠能似天圓鏡不分薄懷千古事今夕共誰云

侍御熊騰霄留別次韻二首

白日展搖落暮山疎鬱天風雲戰清夜江漢幻殘年我
屋蓬蒿熟誰家世界圓忽思浮海歎千古萬緣牽

江山尚幾蟬風氣謾高天碧草嫁時令黃花關暮年國
憂疎鬢繫塵夢蠶兒圓堯舜到今日條腸萬慮牽

送別太史李侍郎先生

抗揖出內閣拂衣離九重江湖動星象風雨蟄雲龍夢
遠暮天濶調高秋意濃老懷閒不了燈火徹晨鐘

黃門母壽

母年如可乞中夜盡情祈白石無爛色青山長翠微鳳
高梧竹麗恩重屋烏肥八月祥風起螭頭亦舞衣

時誣獄得釋舊辱政府相知者以詩見慰因次

韻寄謝二首

雲鵬高自愛南池豈謂神霄竟得知萬國衣冠勞領袖
八朝鐘簴寄安危壚椎海嶽元無迹鈇袞春秋更有詞
成績滿前仍願察華夷猶恐未全熙

超拜何煩撥芋灰帝家飛騎詔回來清風黃閣唐元老
化日光天舜五才名會泰階星象動身迎皇極歲華開
陽和欲徧人間世還聽聲聲畫角梅

送克新內兄還匡南

紫殿西頭夢不成，為逢夷逸轉難平。
乾坤百計徒心赤，今古何人最眼明。
碧海鯨鯢渾欲舞，中原麟鳳太無情。
愁來忽到長干塔，獨立蒼茫看晚晴。

題畫竹

悔教風節動煙霄，總得虛聲太寂寥。
長樂五更聞暖吹，錢塘八月聽寒潮。
調高巢許終何物，怨入夷齊死不消。
更欲少論惆悵事，吳天無語鳳飛遙。

題山水

是箇峯頭挿劒鉞曾無一指畧康莊放開雲陣天常窄
欺盡年華樹錯忙華嶽神遊都醉夢武夷蟬蛻亦虛狂
不知大運如何在傷斷乾坤鑄物腸

鹿澗鳴泉

靈源清駛小山幽雲裏喧厯萬壑秋毀角有時來顧鹿
吐聚何處伏潛虬寒聲動地因風遠晴色翻空激雪流
愧我十年塵土夢飲牛空憶此泉頭

石橋芳桂

石橋東畔桂團陰
天近蓬萊雨露深
雲表一枝翹挺玉
秋香萬葉暗藏金
世傳勝事宜先榜
人望高門比却林
桂下芳聲今益遠
清風肯讓竇公吟

梅山春晚

迤邐蒼蒼曙色開
東風渺見白雲隈
寒封老樹千年話
春逐孤根一夜回
村遠荒雞鳴寂歷
道遲行客意徘徊
多情歲晚空相憶
欲賦慙非杜甫才

萍水秋清

巖前流水不知名
萍約秋波一鑑清
志在史君方攬轡
心通孺子舊歌纓
寒凝片月山將晚
遠映殘紅野欲晴
惆悵美人天各所
兼葭霜冷不勝情

無逸子山歌

錦花紅爛一絲微
打透周家八百幾
圭土寒炎彈指換
稼田稊稗轉頭肥
潮參碣石峯東去
天入陽烏腦上飛
燈火再翻黃帝易
不知何術可垂衣

陳司直清風高節詩

萬慮消磨獨此真散為寒翠壓遊塵鸞鳳有道天誰管
鴻鵠無心奕自春帝聖敢言圖象夢臣愚端稱采薇人
中腸更待從頭說怕愴清風白露神

登靈興山

興發曾論象帝先歌來重上碧山巔鯨鵬海若何非夢
鷄犬淮南未必仙特地風雷空過嶺際天花木殆初筵
商量萬計都無賴只有斯文一脉傳

鳳皇臺次韻

鳳不能來我亦遊興懷多少
寓江流有何黃鶴知人意
無際青天覆此丘前轍幾番蕉
外鹿中華元故海東洲
千年臺上空然到難救滔滔誤學愁

小龜山阻風聞隣笛夜唱

潮痕舊界碧山斜萬吹連艫浪作花
宇宙萍蓬寧此客
海天雲雨定誰家鴻歸漢殿機難寫
鳳入岐周夢久賒
古調沈雄彈不得滿天明月度繁哇

再題愛菊傳君挽章卷

華髮深林已自豪
開門還結四吾曹
茶神靈漱廬生骨
藻思玄翻屈放騷
東閣觀梅風渺杜
南山鋤菊興關陶
芒鞋落日今何處
黃鶴青霄看子毛

題高寺丞竹

虛懷延佇半生心
寥廓相逢恨轉深
雲合洞庭魚鳥散
絃鳴清廟管絃沉
吳剛月殿驚空舞
丁令遼陽鶴錯尋
餘慨欲論猶未得
天涯別後聽遐音

瀑布岩

月高長握笛風急驟添絃欲問來何處青天但默然

板橋

一板雖然薄猶能濟遠人如何當路客鞭石慕亡秦

題石鐘山

天濶鳥雀走月寒煙露清巨濤舂百坎何啻萬鐘聲

枕上聞樵唱

半掩柴扉睡正饒兒童忽地喚行樵山人不是全然懶

只恐天寒雪未消

焚香

風清簾動小綃縕撲上春衫總篆文惆悵阿房風雨後
主家化作海東雲

霽石山

峭石竒峯夾翠流竹籬鐘鼓又晴秋野僧匍匐瞻行色
便道世間無此遊

庭樹

尋常門戶不曾開誰道春來與未來
庭樹無言偏有意密含春色兩三胎

紫蓋峯

昊天晴岫碧相遭萬里羣峯僅幾毛
怪日紫雲飛不去文翁能使蜀山高

天閣山

十年東岱枕書眠別夢因君一慨然
盡說西江山色好幾人蹤跡在梅天

懷舊

斜月巴山起白煙寂寥孤夢託秋弦
相看不盡雲飛鳥
風雨梧桐憶去年

夏日睡起

三尺清風付阿中偶將酣睡與人同
夢回枕上橫雙目
一縷輕煙送遠鴻

葫蘆架

移樹當階引穉藤向空雲雨綠層層
好花歷落葫蘆小

十尺湘簾對曲肱

別廖秉中

殷勤河畔挽餘酣
宇宙茫茫欲謾談
雲白水深清不了
春風還許會江南

河橋柳色

萬動無勞撼古今
青天到老亦難任
閒條閒絮猶何物
繫得男兒幾許心

驛館槐陰

高樹凝雲殆障天相逢俱是藉雲眠
丁寧再勿私風露
江海年來傷亂蟬

大橋牧笛

去聖迢迢一信無
頽波何處可勝呼
沉情數弄穿雲曲
海色天風奈許孤

梅花圖

野韻寥寥起太清
溥天容易對誰鳴
餘尋萬古無痕月
聽奏冰絃一再行

村店

風雲旌節自村村煙火相望子哺孫王化已知無內外
生愁寒霧障天門

雙桂卷為河南吳進士昇作

雲簾霧箔隔仙都八月天河見玉膚憶自二郎相別後
素娥無夢碧鸞孤

順承門外

水落雲寒野墓孤夕陽紅樹血模糊香簾翠幕知何許

三月天南聽鷓鴣

偶得梅花以插西階之下累日灼灼如新

當階寒玉一枝微去樹猶能趁雨肥因憶故人前日夢
沉冥無復轉柴扉

題徐內翰素扇時余欲南省也

孤飄片月欲交飛塵土三年不上衣此意近來難說與
浩歌天際約秋歸

山行

十里黃花半野橋
午雲晴鶴兩爭遙
樵回耳熱孤心在
徧踏晴峯按寂寥

聞笛

絲絲楊柳絆行舸
盡數魚龍弄晚濤
南畔一聲何物笛
紫薇垣外客星高

銅陵崇福寺

白浪黃流窓滿風
薄陰天際傍孤篷
浮生未了青山色
明日孤雲又向東

留別邦濟

道路周流已六年，又從名館借高眠。
非無一覺東周夢，黃鶴清風戀遠天。

題錢秋官菊


匝地風雲空暮色，溥天雷雨自春芽。
何人挽得秋香轉，猛拍闌干怨露華。

宿黃蘗寺

重疊青山足浩觀，水深波渺借幽蟠。
秋聲一夜不得住，

搖蕩九天孤月寒

公諱宣字師尼別號野菴弱冠領景泰癸酉鄉試屢
上春官不第與海內名流講性命之學叅留府軍事
以直道矯正元戎之朘削者被誣繫獄十年方得白
已而轉中府冢宰思軒王公甚重之陞貴州慶遠知
府卒其臨終有詩云經濟半生渾是夢源流千古更
何人衷腸欲了男兒負靈藥難裁疾疾身其大致如
此



石倉歷代詩選卷三百八十八